

四庫全書

子部

欽定四庫全書

子部

外臺秘要方卷二十九

詳校官太醫院恩糧臣表天錫

編修臣倉聖脈覆勘

總校官進士臣繆琪

校對官助教臣卜惟吉

謄錄監生臣張同履

欽定四庫全書

外臺秘要方卷二十九

唐 王燾 撰

從高墮下方三首

千金療丈夫從高墮下傷五藏微者唾血甚者吐血及
金瘡傷絕崩中皆主之方

阿膠

炙

乾薑

各二兩

艾葉

芍藥

各三兩

右四味切以水八升煮取三升去滓入膠令消分二

服羸人三服女人產後崩中傷下血過多虛喘腹中絞痛下血不止服之悉愈

又療從高墮下瀉血及女人崩中方

當歸 二分

大黃 一分

右二味搗為散酒服方寸匕日三

范汪同並出第二十六卷中

千金翼膠艾湯主男子傷絕或從高墮下傷五藏微者唾血甚者吐血及金瘡經內絕者方

阿膠 炙

艾葉

芍藥

乾地黄

各三兩

乾薑

當歸

甘草

炙

芎藭

各二兩

右八味切以水八升煮取三升去滓內膠令烊分再服羸人三服此湯正主婦人產後崩中傷下血多虛喘欲死腹痛血不止者服之良

出第十九卷中

從高墮下瘀血及折傷內損方一十八首

廣濟療從高墮下內損瘀血消血散方

蒲黃

十分

當歸

乾薑

桂心

各八分

大黃

十二分

蜚蠊

四分去足翅熬

右六味搗為散空腹以酒服方寸匕日再漸漸加至

一七半忌生葱豬肉

出第四卷中

肘後療卒從高墮下瘀血脹心面青短氣欲死方

取胡粉一錢七以水服之

備急文仲同

又方

煮大豆或小豆令熟飲汁數升和酒服之彌佳

千金

備急文仲同一云大豆二升煮令熟取汁二升去豆以醇酒六七升和飲之一日飲盡小豆亦佳

又方

生乾地黄二兩熬末以酒服之

又方

生地黄搗取汁服一升或二升尤佳

又方

烏鴉翅羽二七枚燒末酒和服之即當吐血也如
得左羽尤佳

又療從高墮下若為重物所頓竿得瘀血方

豆豉三升沸湯二升漬之食頃絞去滓內蒲黃三

合攪調頓服之不過三四服神良

刪繁小品文仲
備急集驗千金同

又方

烏梅五升去核以飴糖五升煮稍稍食之自消

文仲

備急千金同

又方

取茅連根葉搗絞取汁一二升服之不過三四服

愈冬用根

又方

刮琥珀屑酒服方寸匕取蒲黃二三七日四五服

良

又方

末鹿角酒服三方寸匕日三

千金同

又方

取敗蒲薦燒灰以酒服方寸匕

並出第三卷中

深師療從高墮下傷內血在腹聚不出療下血方

取好大黃

二兩

桃仁三十枚

右二味搗以水五升煮取三升分為三服去血後作地黃酒服隨能服多少益血過百日成微堅者不可復下之虛極殺人也

又療墮落瘀血桃枝湯方

桃枝

一握中
指長剉

芒硝

五分

大黃

四兩

當歸

甘草

炙

桂心

各二兩

蜜蟲

二十枚去
翅足熬

水蛭

二十枚熬

桃仁

五十枚去
尖皮熬

右九味㕮咀以水八升煮取三升去滓溫分三服內消

又療墮落積瘀血消血理中膏方

大黃

二兩

豬脂

二斤

桂心

一兩

乾薑

一兩

當歸

二兩

通草

亂髮

各一兩

右七味切以膏煎髮令消盡搗藥下篩須令絕細下膏置地內諸藥攪勻微火煎之三上三下即藥成去

滓以好酒服一兩日二服一方不去滓

並出第二十卷中

千金療從高墮下及被木石所迫或因落馬凡是傷損血瘀凝積氣急欲絕無不療方

淨土五升蒸之令極熟分半以故布數重裹之熨
病上勿令大熱恐破肉候冷即易之以痛止即已
但有損傷並以此法療之神効已死不能言者亦
活三十年亦差

又療從高墮下損有瘀血方

蒲黃

八兩

附子

一兩炮去皮末

右二味為散以酒服五六錢七日三不知增之並出

第二十六卷中

近効土質汗療折傷內損有瘀血每天陰則疼痛煎療

產婦產後諸疾神効方

開寶本草云質汗主金瘡傷折瘀血內損補筋消惡血下血婦

人產後諸血並酒消服之亦敷病處出西蕃如凝血蕃人煎甘草松淚檉乳地黃並熱血成之今以益母成煎故謂之土質汗也

三月採益母草一重擔

一名夏枯草

右一味揀擇去諸雜草及乾葉以新水淨洗於箔上攤曬令水盡則用手揅斷可長五寸勿用刀切即置鑊中量水兩石令水高草三二寸則縱火煎候益母

草糜爛水三分減二漉去草取五六斗汁瀉入盆中
澄之半日以綿濾取清汁盆中滓澱並盡棄之其清
汁於小釜中慢火煎取一斗如稀飴每取梨許大煖
酒和服之日再服和羹粥喫並得如遠行不能將稀
煎去即更鍊令稠硬停作小丸服之七日內則疼痛
漸瘳二七日平復或有產婦惡露不盡及血運一兩
服即差其藥兼療風益心力無所忌

鄭長史處吏部

李郎中服之得力

墜損方三首

廣濟療墜損骨肉苦疼痛不可忍方

故馬羶兩段其羶欲得故膩者於鐺中以酒五六升著一抄鹽煮令熟即內羶於鐺中看羶熟便用裹所損處冷即易之勿令久熱傷肉如是三五遍痛定即止仍服止痛藥散即漸差

又療男子虛勞墜傷內損吐血不止欲死面目黑如漆者悉主之方

黃芪

芎藭

當歸

芍藥

各三兩

甘草

三兩
灸

生薑

八兩

右六味切以水九升煮取二升五合去滓分溫三服
服別相去六七里

並出第四卷中

近効療墜損方

生地黄一斤分為三分

右每服取一分熬令焦黃以酒半升煎一兩沸絞去滓令溫煖得所食前日三無所忌馬墜亦療之

墜落車馬方六首

肘後療忽落馬墜車及墜屋坑崖腕傷身體頭面四肢
內外切痛煩躁叫喚不得卧方

急覓鼠矢無問多少燒搗末以猪膏和塗封痛處
急裹之仍取好大黃如雞子大以亂髮裹上如鴨
子大以人所裁白越布衫領巾間餘布以裹髮外
乃令火燒煙斷搗末屑薄以酒服日再三無越布
餘布可強用常當預備此物為要

備急集驗古今錄
驗同出第三卷中

千金療凡人墜落車馬心腹積血唾吐血無數方

乾藕根末酒服方寸匕日三如無取新者搗取汁服之尤妙

又療墮馬及樹崩瘀血腹滿短氣方

大豆五升水一斗煮得二升半去豆頓服劇者不過三服

並出第二十六卷中

千金翼療落馬墮車及諸傷腕折臂脚疼痛不止方

黃芪

芍藥

各三兩

乾地黄

當歸

附子 炮

通草

續斷

桂心

乾薑

各二兩

蜀椒

一合汗

烏頭

半兩炮

右十一味搗為散先食酒服五分匕日三忌如常法
本方有大黃一兩又云服方寸匕出第十九卷中

救急療墜馬落車被打傷腕折臂呼喚痛聲不絕服此
散呼喻之間不復大痛三日筋骨相連當歸散方

當歸

熟令香

桂心

甘草

炙

蜀椒

汗各二分

芫莩

六分熱

附子

炮

澤蘭

熬各一分

右七味搗為散酒服方寸七日三小兒被奔車馬所損裂其膝皮肉決見骨即絕死小蘇啼不可聽聞服之便眠十數日便行走其神驗如此忌同前方

千金

翼深師同出第六卷中

近効療墮馬內損方

取廬藥一小兩搗為末牛乳一盞煎五六沸和服

李諫議云廬藥以羊肉汁和服一日內不用喫菜

極効

出第一卷中

折骨方三首

肘後療凡脫折折骨諸瘡腫者慎不可當風卧濕及多
自扇若中風則發瘕口噤殺人若已中此覺頸項強身
中急束者急服此方

竹瀝飲三二升若口已噤者可以物拗開內之令
下禁冷飲食及飲酒竹瀝卒燒難得多可合束十
許枚併燒中央兩頭承其汁投之可活

小品備急

文仲古今錄驗同出第三卷中

千金療腕折骨痛不可忍方

取大麻根葉無問多少擣取汁飲一小升無生青者以乾者煮取汁服亦主墮墜打槌瘀血心腹脹

滿短氣良

出第二十六卷中

救急療骨折接令如故不限人畜也方

取鈷銹銅錯取末仍擣以絹篩和少酒服之亦可

食物和服之不過兩方寸匕以來任意斟酌之出

九卷中

傷筋方三首

千金療被傷筋絕方

取蟹頭中腦及足中髓熬之內瘡中筋即續生

又方

搗葛根汁飲之葛白屑熬令黃敷瘡止血

並出第二十六卷中

救急續斷筋方

取旋覆草根淨洗去上擣量瘡大小取多少敷之

日一易之以差為度

必効同出第九卷中

筋骨俱傷方七首

肘後療腕折四肢骨破碎及筋傷蹉跌方

爛擣生地黃熬之以裹折傷處以竹片夾裹之令

遍病上急縛勿令轉動一日可十易三日即差

千金

刪繁備急文仲古今錄驗同

又方

取生枯樓根擣之以塗損上以重布裹之熱除痛

止備急同

又方

搗大豆末合豬膏和塗之乾即易之

並出第三卷中

深師療折腕傷筋骨槐子膏方

槐子中仁

秦艽

白朮

續斷

各一兩

桂心

六分

巴豆

十枚去皮心熬

大附子

一枚炮

右七味㕮咀以醇苦酒漬槐子等一宿以成鍊豬脂

二斤於微火上煎三上三下候膏成絞去滓溫酒服

棗子許一枚日三并塗敷忌生葱豬肉冷水蘆筍桃

李雀肉等

出第二十卷中

千金療四肢骨碎及傷筋蹉跌方

生地黃多少熟搗熬以裹傷骨處頻易

古今錄驗同

又方

豉三升以水七升漬之絞去滓取汁飲止煩悶

古今

錄驗同

又方

乾地黃

當歸

獨活

苦參

各二兩

右四味搗末以酒服方寸匕日三服

並出第二十六卷中

折腕方一首

深師卓氏膏

大附子

四枚生用去皮

右一味切苦酒漬三宿以脂膏一斤煎之三上三下膏成敷之亦療卒中風口噤頸項強

出第二十六卷中

折腕瘀血方四首

千金療折腕瘀血方

蛭蟲

去足
翅熬

牡丹

等分

右二味為散以酒服方寸匕血化成水

又方

大黃

六兩

桂心

二兩

桃仁

六十枚去皮

右三味切以酒六升煮取三升分三服當下血差

並出

第二十六卷中

千金翼療折腕瘀血方

菴蘭草汁飲之亦可作散服

出第十九卷中

古今錄驗療折腕瘀血方

蒲黃 一升
當歸 二兩

右二味搗散酒服方寸匕日三先食服之

千金同出第三十四卷中

蹉跌方三首

深師療蹉跌補絕復傷地黃散方

乾地黃 十分

桂心

乾薑

芳藟

甘草 灸

當歸 各二分

芍藥 五分

右七味搗為散先食以酒服方寸匕日三服

又方

大豆

熱令黑

大黃

各二兩

桂心

一兩

右三味搗為散分為三劑酒和服忌生葱又大黃一兩生地黃三兩切熬以水酒二升煮取一升頓服之

差

出第二十六卷中

范汪蹉跌膏兼療金瘡方

當歸

續斷

附子

去皮

細辛

甘草

炙

通草

芫薺

白芷

牛膝

各二兩

蜀椒

二合

右十味㕮咀以猪膏二斤煎以白芷色黄膏成絞去

滓日再以摩損處

出第十卷中

被打有瘀血方一十三首

肘後療若為人所打舉身盡有瘀血方

刮青竹皮

二升

亂髮

如鷄子大四枚燒灰

延胡索

二兩

右三味擣散以一合酒一升煎三沸頓服日三四

急備

范汪同

又療被打擊有瘀血在腹內久不消時時發動方

大黃

二兩

乾地黃

四兩

右二味搗散為丸以酒服三十九日再為散服亦妙
備急文仲小品范汪等同並出第三卷中

范汪療被打有瘀血方

大黃

二兩

桃仁

去尖皮熬

蜚蠊

各二十一枚去足翅熬

右三味搗蜜丸四九即內酒一升煎取七合服之急備

肘後同

又方

薑葉

切一升

當歸

三兩

右二味為末以酒服方寸匕日三

並出第十卷中

備急若久血不除變成膿者宜此方

大黃

三兩

桃仁

三十枚去皮尖

右二味切以水五升煮取三升分三服當下膿血不

盡更作

文仲肘後同

又若久宿血在諸骨節及脅肋外不去者方

牡丹

蚘蟲

去足熱等分

右二味搗末以酒服方寸匕血化成水

小品文仲千金並翼古今錄驗同

又方

大黃

如雞子一枚

蚯蚓矢

一合

右二味酒半升煮取三沸服之

又方

鐵一斤酒三升煮取一升服之又燒令赤投酒服

之

小品文仲肘後同出第八卷中

千金療被打傷破腹中有瘀血方

蒲黃

一升

當歸

桂心

各二兩

右三味搗散以酒服方寸匕日三夜一不能酒飲服之

劉消子方

又方

搗菰苳子末以敷瘡上

又凡有瘀血者其人喜忘不欲聞人聲胃中氣塞短氣方

甘草

一兩
炙

茯苓

二兩

杏仁

五合

右三味切以水一斗煮取三升分為三服

范汪同

又被歐擊損傷聚血腹滿方

豉一升以水二升煮三沸去滓再服不瘥重服之

范汪同並出第二十六卷中

張文仲劉涓子療被打腹中瘀血白馬蹄散方

白馬蹄燒令烟斷擣末以酒服方寸七日三夜一

亦療婦人瘀血消化為水

肘後備急千金同

被打損青腫方七首

千金療被打頭眼青腫方

用新熟羊肉敷之

又方

大豆黃末和敷之

又方

牆上朽骨唾於石上研摩塗之乾即易

又方

釜月下土細末塗之

又方

羊皮上卧之

又方

炙肥猪肉令熟搗上又炙猪肝貼之亦佳

出第二十卷中

文仲療被打青腫方

以水磨桂塗之赤則以牆中朽骨磨塗之則平復

也 梁都督侍中傳効也出第八卷中

許仁則療吐血及墮損方三首

許仁則論曰此病有兩種一者緣墮打損內傷而致此病一者緣積熱兼勞而有此病若內傷自須依前墮墜內損大便血等諸方救之若積熱累勞吐血狀更無餘候但覺心中惛惛似欲取吐背上煩熱便致此病宜依後雞蘇七味湯桑白皮八味散療之方

雞蘇

五兩

生地黃

切

青竹筍

各一升

生薑

桑白皮

各六兩

小薊根

切六合

生葛根

切六合

右藥切以水九升煮取三升去滓分溫三服服別相
去如人行十里久若一劑得力欲重合服至四五劑
尤佳隔三四日服一劑如未定則宜合後桑白皮八
味散服之

桑白皮散方

桑根白皮

六兩

生薑屑

六兩

柏葉

雞蘇

各四兩

小薊根

五兩

乾地黄

七兩

青竹筍

一升
新者

地菰

三兩

右藥搗散煮桑白皮飲和一方寸七日再服漸漸加

至二三七以竹瀝下亦得

又此病有兩種一者外損一者內傷外損因墜打壓損或手足肢節肱頭項傷折骨節痛不可忍覺內損者須依前內損法服湯藥如不內損只傷肢節宜依後生地黃一味薄之法及芥子蘇等摩之方

生地黃無問多少淨洗擣碎令爛熬之候水氣盡及熱以薄折處冷即易之如骨蹉跌即依療折傷法縹縛蕪薄羊腦生龜生鼠等法為有所損此不

復載如傷損處輕搗芥子和蘇以摩傷處若被打
墜壓傷損急卒雖不至昏悶腹內無覺觸然身之
中相去非遠外雖無狀內宜通利或慮損傷氣不
散外雖備用諸方腹內亦須資藥但不勞大湯如
前內損欲死者服湯取利欲用時間小小諸物服
之理應無嫌其法略出如後小便酒煮生地黃每
始王木絃木梓葉廬藥檜藥豬脂及石蜜白石地
菰延胡索赤泥藥

以上十一物並出下卷吳昇同

金瘡禁忌序一首

肘後凡金瘡去血其人若渴當忍之常用乾食並肥脂之物以止渴慎勿鹹食若多飲粥輩則血溢出殺人不
可救也又忌嗔怒大言笑思想陰陽行動作勞勿多食
酸鹹飲酒熱羹臠輩皆使瘡痛腫發甚者即死瘡瘥後
猶爾出百日半年乃稍復常耳凡金瘡傷天窻眉角腦
戶臂裏跳脉髀內陰股兩乳上下心鳩尾小腸及五臟
六腑輸此皆是死處不可療也又破腦出血而不能言

語戴眼直視咽中沸聲口急唾出兩手妄舉亦皆死候
不可療若腦出而無諸候者可療又療卒無汗者中風
也瘡邊自出黃汁者中水也並欲作瘡候可急療之又
痛不在瘡處者傷經也亦死之兆又血出不可止前赤
後黑或白肌肉腐臭寒冷堅急者其瘡難愈亦死也

並出

第三卷中

金瘡預備膏散方三首

肘後療金瘡膏散三種宜預備合以防急疾之要續斷

膏方

蜀續斷

蛇銜

防風

各三兩

右三味切以猪脂三斤於東向露竈煎之三下三上膏成去滓若深大瘡者但敷四邊未可使合若淺小瘡者但通敷便相連令止血住痛亦可以酒服如杏子大

又治葛蛇銜膏方

蛇銜

薔薇根

續斷

治葛

各二兩

當歸

附子

各一兩
半去皮

防風

黃芩

澤蘭

各一兩

松脂

柏脂

各三兩

右十一味㕮咀以豬脂二斤煎之別以白芷一枚內中候色黃即膏成去滓濾以密器收貯之以塗瘡無問大小皆差不生膿汁也

出第七卷中

深師預備金瘡散方

乾薑

甘草

灸

桂心

各一兩

當歸

三兩

芫薺

四兩

蜀椒

三兩汗

右六味搗散以酒服方寸七日三

肘後同出第二十卷中

金瘡方一十一首

肘後療金瘡方

割蘊方一寸燒灰研以敷之瘥

又方

杏仁去皮尖搗如泥石灰分等以豬脂和之淹足
合煎令杏仁黃紋去滓以塗瘡上日五六遍愈

又方

燒故青布作灰敷瘡上裹縛之數日瘡可解去

又方

以蛇銜草搗敷之差

又方

狼牙草莖葉熟搗敷貼之兼止血

一方燼草按敷之

又方

五月五日掘葛根暴乾搗末敷瘡上止血止痛

又方

釣樟根出江南刮取屑敷瘡上有神驗

又方

紫檀末以敷金瘡止痛止血生肌

又方

燒牡蠣末敷之佳凡裹縛瘡用故布帛不寬不急

如繫衣帶即好

並出第七卷中

近効金瘡或壓損斷裂方

剝取新桑皮作線縫之又以新桑皮裹之以桑白

汁塗之極驗小瘡但以桑皮裏即差

又金瘡灸瘡火燒瘡等方

蠟

如胡桃

杏子

一抄爛搗

檳榔仁

一枚

薰陸香

半合

右四味和搗以猪脂煎即以此藥塗帛上貼瘡此方甚

効

金瘡續筋骨方三首

千金療金瘡粉散辟風水續筋骨止血方

石灰

地菰苗

細辛

旋復根

葛葉

猪膏

青蒿

麥門冬苗

益母苗

不限多少切

右九味搗取汁和石灰作餅子暴乾末如粉以敷傷
瘡上止血止痛生肌五月五日合之神効

出第二十卷中

必効療被斫筋斷者續筋方

旋覆根搗汁瀝瘡中仍用滓封瘡上即封裏之十

五日即斷筋便續矣更不須開易

此方出蘇景仲家瘡奴用効出第四卷中

古今錄驗療金瘡中筋骨續斷散方

續斷

五兩

乾地黄

蛇衞

地榆

杜蘅

各四兩

乾薑

蜀椒

汗

細辛

桂心

各一兩

當歸

芎藭

蓯蓉

芍藥

各三兩

人參

甘草

炙

附子

炮去皮各二兩

右十六味搗為散以酒飲和服方寸匕日三服忌海

藻松菜生菜生葱猪肉冷水

一方無杜蘅有杜礪出第三十四卷中

金瘡止痛方五首

范汪療金瘡內塞止痛地榆散方

地榆根

白欬

各二分

附子

一分炮

當歸

四分

芎藭

白芷

芍藥

各三分

右七味搗散以酒飲服方寸七日三服忌同前方

又金瘡內塞逐痛方

黃芩

當歸

各三兩

甘草

炙二兩

細辛

烏頭

炮各二兩

乾薑

一兩

白芷

四兩

右七味搗篩以酒飲服一錢七日三可至二錢七忌

同前方

又金瘡止痛方

馬蹄燒灰三指撮以酒和服之

並出第十九卷中

千金凡金瘡若刺瘡痛不可忍者方

葱白一把水三升煮數沸漬洗瘡上痛即止

亦治

因水入疼痛翼深師同出第二十六卷中

古今錄驗療金瘡止痛牡蠣散方

牡蠣

二分
熬

石膏

一分

右二味下篩以粉瘡痛即止

出第三十四卷中

金瘡生肌方四首

廣濟療金瘡生肌破血補勞消瘡輕身紫葛湯方

紫葛三握細剉之以順流河水三大升煎取一升
二合去滓空腹分三服若冷以酒一大升水二升
和煮取一大升

無忌出第六卷中

范汪療金瘡內塞止痛生肌肉散方

當歸

甘草

炙

肉蓯蓉

芎藭

芍藥

蜀椒

汗

吳茱萸

乾薑

桂心

白及

黃芪

厚朴

人參

右十三味等分搗為散以酒飲服一方寸匕日三服

忌如前方

又療金瘡生肌白膏方

白芷

一兩
六銖

乾地黄

一兩
半

芎藭

一兩
六銖

甘草

半兩
炙

當歸

白歛

附子

各十八
銖去皮

蜀椒

二合
半汗

右八味㕮咀以豬脂五斤合煎三上三下藥成去滓

塗瘡上日再忌同前方

並出第九十五卷中

古今錄驗療金瘡生肌散方

甘草

一斤
炙

黃蘗

八兩

當歸

四兩

右三味擣末以封瘡上日再

出第三十四卷中

金瘡去血多虛竭內補方二首

千金療金瘡去血多虛竭內補方

當歸

三兩

芍藥

細辛

各五分

乾薑

三分

甘草

二分
炙

右五味為散以酒服方寸七日三夜一忌同前方

出第

二十六卷中

古今錄驗療金瘡去血多虛竭內補方

蜀椒

三分

乾薑

二分

茯苓

甘草

炙

芍藥

當歸

芎藭

桂心

黃芩

人參

黃芪

厚朴

炙

吳茱萸

桑白皮

各一兩

右十四味搗散以酒服方寸七日三

一方有白及無桑白皮千金翼

同出第三十四卷中

金瘡中風方八首

肘後療金瘡中風方

蜀椒量瘡大小用麴作餽餽煑灰中炮令熟及熟
開一小口當瘡上掩之即引風出可多作取差急備

小品同出第三卷中

必効療金瘡中風角弓反張者方

取杏仁碎之蒸令餹擣絞取脂服一小升許兼以

摩瘡上即差

又方

取蒜一大升破去心以無灰酒四升煮蒜令極爛
並滓服一大升以來須臾汗如雨出則差

又療口噤不能語方

蔓菁子淨洗一升擣令細粘手撮為炷以灸瘡上
一兩度熱徹即差兼服後方

又療因瘡著風方

雞糞一合烏豆二升皀令淨二味相和於鑊中熬令焦黑及熱瀉出以酒二大升淋之與服隨多少令盡取汗差如無汗更作服

又療因瘡著風角弓反張方

取葭蓉根可瘡大小截令平如無大者並縛數根稱瘡以為限猪脂一大合鹽末一雞子黃大和膏於火上溫之令膏鹽相得不用過熱熱即傷肉以煖得炷瘡上冷即易之為兩炷於埴器中燒之更

相用以差止驗

又方

生雞子烏麻沙二味合煎稍稠待冷以封瘡上

古今錄驗療金瘡得風身體痠強口噤不能語或因破打而得及斧刀所傷得風臨死總用此方無有不差瓠
瓠燒麻燭熏之方

取未開瓠瓠一枚長柄者開其口隨瘡大小開之
令瘡相當可繞四邊閉塞勿使通氣上復開一孔

如盥口取浮麻子燭兩條並然瓠瓠向上燭盡更續之不過半日即差若不止亦可經一兩日熏之以差為度若燭長不得內入瓠瓠可中折用之

出第

三十四卷中

諸瘡中風寒水露方五首

文仲云凡以八九月刺手足金瘡及諸瘡中寒露水冷毒皆殺人不可輕也療之方

生竹若桑枝兩條著塘火中令極熱斫斷炷瘡口

中熱氣盡更易一枚盡二枚則瘡當爛乃取薤白
搗以綿裹著熱灰中使極熱去綿以薤白薄瘡上
布帛急裹之

肘後千金同

又療若已中水及惡露風寒腫痛方

以鹽數合著瘡上以火炙之令熱達瘡中畢以蠟
內竹管插熱灰中令烱以滴入瘡中即便愈若無
鹽用薤白但單用蠟亦良

肘後同出第五卷中

備急療諸瘡中風寒水露腫痛云因瘡而腫者皆中水

及中風寒所作也其腫氣入腹則殺人也方

燒黍穰或牛馬乾糞桑條輩多烟之物掘地作坎
於中燒之以版掩坎上穿版作小孔以瘡口當孔
上熏之令瘡汁出盡乃止又滴熱蠟瘡中佳

集驗

肘後文仲同

又方

以桑灰汁溫之以漬瘡大良姚云神驗

肘後千金同
出第十八卷中

近効療瘡因水入疼痛方

取生葱一束搗以脚踏上須臾更著之差

李諫議

房給事錄試効

被刀箭傷方一十一首

劉涓子療金瘡箭在肉中不出方

半夏

三兩洗

白歛

三兩

右二味下篩以酒服方寸七日三淺者十日出深者

二十日出終不住肉中

肘後千金文仲小品同出第三卷中

肘後療卒被毒箭方

搗藍青絞取汁飲之並薄瘡上若無藍取青布漬

之絞取汁飲之亦以汁淋灌瘡中

肘後范汪文仲
備急千金同

又方

煮藕取汁飲之多多益善

肘後文仲備急同

又方

但多食生葛根自愈或搗生葛絞取汁飲之乾者

煮飲之

小品千金集驗備急文仲同

又方

乾薑鹽等分搗末敷瘡上毒皆自出

范汪肘後備急
同一作乾葛

又凡毒箭有三種交廣夷俚用焦銅作鏃次嶺北用諸
蛇蟲毒螫物汁著管中漬箭鏃此二種纔傷皮便洪腫
沸爛而死唯射猪犬雖困猶得活以其噉人糞故也人
若有中之便即食糞或絞濾取汁飲之並以塗瘡上須
臾即定不爾不可救也又一種是今之獵師射麋鹿用
射罔以塗箭鏃人中之當時亦困頓著寬處者不死若
近胃腹亦宜急療之今葛氏方是射罔者耳

又療箭鏑及諸刃刀在咽喉胃膈諸隱處不出者方

牡丹 一分

白歛 二分

右二味搗末以溫酒服方寸七日三服刀自出

肘後

備急千金同出第九卷中

小品療被毒箭傷方

雄黃末敷之愈

肘後千金集驗同此方亦療蛇毒

又方

食麻子數升愈搗飲其汁亦佳

肘後范汪千金同出第十卷中

集驗療毒箭方

以鹽滿瘡中灸鹽上三十壯

肘後同

又方

煮蘆根汁飲一二升

范汪小品同一云煮薑汁飲二三升

又療刀箭瘡有血不止方

以小兒矢塗封之三日即差並不傷人

出第九卷中

竹木刺不出方一十六首

劉涓子竹木刺不出方

鹿角燒灰末以水和塗之立出久者不過一夕

集驗

文仲備急肘後范汪古今錄驗深師同出第三卷中

肘後療竹木刺不出方

取羊糞燥者燒灰和脂塗之刺若未出重敷之

刪繁

集驗千金備急深師同一云用乾羊糞末

又方

嚼白梅塗之

集驗千金同

又方

王不留行末服之並敷上即出

集驗文仲深師千金同

又方

搗烏梅水和塗之刺上立出

千金用白梅並出第三卷中

深師療刺不出方

以鹿腦厚敷上燥復易之半日即出

出第二十九卷中

集驗療刺藏在肉中不出方

用牛膝根莖合搗以敷之即出縱瘡合其刺猶自

出

肘後備急文仲范汪深師千金同出第九卷中

千金療刺在人肉中不出方

煮瞿麥汁飲之日三立出

又方

溫小便漬之

又方

白茅根燒末以膏和塗之亦主諸瘡因風致腫

肘後同

又方

薔薇燒灰以水服方寸匕日二度十日刺出

又方

燒鑿柄為灰酒服二方寸匕

又方

酸棗核燒末服之差

又方

頭垢塗之

並出第二十六卷中

文仲療竹木刺不出方

刮象牙屑水和塗刺上立出

肘後范汪備急深師
同出第八卷中

救急療竹木刺傷方

嚼豉封之立差

千金肘後同出第九卷中

狐尿刺方二首

千金翼論凡諸螳螂之類盛暑之時多有孕育遊諸物上必有精汁其汁乾久則有毒人手觸之不疑之間則成其疾故曰狐尿刺日夜燔痛不識眠睡百方療不能差方

但取蒲公英莖葉根斷之取白汁塗令厚一分即

差神驗

出第二十四卷中

肘後療狐尿棘刺人腫痛欲死方

以熱桑柴灰汁漬之冷復易永差

備急崔氏同出第八卷中

狐刺方五首

崔氏療狐刺方

取好豉心以足為限但覺被刺即熟嚼豉以薄之
少頃看豉中當見毛不見又速嚼豉數薄之以晝
夜勿絕但以毛盡便愈

又方

熱搗杏仁細研煮一兩沸承熱以浸刺處數數易

之大良

古今錄驗同

集驗療狐刺方

熱魚汁灌瘡中

備急療狐刺方

以熱蠟灌瘡中又烟熏之令汁出愈此狐所溺之

木猶如蛇螫也

肘後小品文仲同出第八卷中

必効主狐刺痛如烏啄者方

生括樓香豉二味等分搗之為餅敷患處乾即易

之効

段家方出第六卷中

惡刺方三首

千金翼療惡刺方

五月蔓菁子搗末和烏牛乳封之無烏牛但是牛

乳亦得

本方云人乳亦得出第二十四卷中

古今錄驗療惡刺方

取未煮餅油脂以麪和油調須臾著瘡上即愈
蔓菁根和粉以麪和油
云一

又方

取麪末和獨頭蒜搗之內瘡孔中蟲出即差
出第

三十五卷中

灸瘡方四首

肘後論曰凡灸不依明堂脉穴或是惡日神惡時殺病人年神人神所犯天地昏暗日月無光久積陰沉及灸

日食毒物方畢或灸觸犯房室等其灸瘡洪腫發作疼痛病人加甚灸者疾本不痊增其火毒日夜楚痛遇其凡愚取次亂灸此皆因火毒傷藏即死矣今用方療之

柏白皮

三兩

當歸

一兩

薤白

一握

右三味切以豬脂一升煎三上三下以薤白黃絞去滓以塗瘡上亦療風水中瘡火瘡

出第三卷中

集驗療灸瘡痛腫急方

搗竈中黃土末之以水和煮令熟以漬之

深師千金肘後同

又療灸瘡薤白膏生肌肉止痛方

薤白

當歸

各二兩

白芷

一兩

羊髓 一斤

右四味㕮咀以羊髓煎白芷色黃藥成去滓以敷瘡
上日二 肘後千金文仲同出第八卷中

千金療灸瘡方

甘草

炙

當歸

各一兩

胡粉

六分一作胡麻

羊脂

六分

右四味切以豬脂五合煎之去滓以敷瘡上忌海藻

菰菜

出第二十六卷中

灸瘡膿不差方三首

肘後療灸瘡膿不差方

白蜜

一兩

烏賊骨

一兩末

右二味相和以塗之

千金同

千金療灸瘡膿壞不差方

臘月猪脂

一斤

薤白

切一升

胡粉

一兩

右三味先煎薤白令黃去之綿裹石灰一兩更煎去之入胡粉令調敷之日三

又方

石灰一兩末細絹篩以猪脂和相得微火上煎數沸先以煖湯洗瘡訖以布裹灰熨瘡上三過便以藥貼瘡上灸之又搗薤敷之

肘後同出第二十六卷中

火燒瘡及火油天火瘡方三首

集驗凡被火燒者初慎勿以冷水冷物並井下泥火瘡得冷即熱氣更深轉入至骨爛壞人筋攣縮者良由此也

又療卒被火燒苦劇悶絕不識人方

取新熱小便飲一升及冷水和蜜飲之口噤不開

者可拗開灌之其悶差然後療外乃善

千金古今錄驗崔氏

小品同出第八卷中

千金療火瘡方

未熬麻油和梔子仁末塗之唯厚為佳已成瘡者

篩白煇灰粉之即差

出第二十六卷中

近効療火油及天火瘡初出似沸子漸漸大如水泡似

火燒瘡赤色熱翕翕須臾浸淫漸多急速者是也方

芸薹菜不限多少搗絞取汁芒硝大黃生鐵衣各等分搗大黃末相和芒硝等以芸薹汁調如稀糊以秃筆點藥敷瘡上乾即再點頻用極有效閭師云芸薹冬月煮取汁洗亦可

火灼爛壞方五首

劉涓子療火燒人肉爛壞麻子膏方

麻子

一合

柏白皮

山梔子

碎

白芷

甘草

各一兩

柳白皮

一兩

右六味咬咀以豬脂一升煎三上三下去滓以塗瘡

上日三

出第五卷中

集驗療火爛瘡膏方

柏白皮

生地黄

研各四兩

苦竹葉

甘草

各四兩

右四味切以豬脂一斤煎三上三下藥成濾去滓以

摩瘡上日再摩

千金無地黃深師千金劉涓子范汪同出第八卷中

千金墮火灼爛瘡方

榆白皮熟嚼封之差

又火瘡敗壞方

柏白皮切臘月猪膏合淹相和煮四五沸色變去

滓塗瘡

范汪同出第二十六卷中

又方

柏白皮

生地黄

黃芩

蛇銜

梔子

苦竹葉

各一兩

右六味切以羊髓半升煎之三上三下去滓塗瘡上

差

湯火所灼未成瘡及已成瘡方一十一首

肘後療湯火所灼未成瘡者方

取煖灰以水和習習爾以敷之亦以灰汁洗之

又方

黍米

女麴分等

右二味各異熬令黑如炭擣下以雞子白和塗之良

又方

取菰蔣根洗去土燒灰雞子黃和塗之

又方

取柳白皮細切以猪膏煎以塗之以柏白皮彌佳
凡此以上三方皆能止痛疾仍不成瘡也

又方

以小便漬洗之

又方

以苦酒和雄黃塗之

又若已成瘡者方

以白蜜塗瘡上取竹幕貼之日三

出第七卷中

范汪療湯火灼瘡方

破雞子取白塗之

肘後同

又方

以豆醬汁塗之

肘後文仲同並出第九十一卷中

備急療湯火灼瘡方

柳皮燒灰如粉敷之

肘後同

又方

猪膏和米粉塗之日五六過良此二方既令不痛

又使速愈又無癰痕已試有效

肘後同出第八卷中

湯火瘡無問大小方四首

崔氏療湯火瘡無問大小秘要方

取狗毛碎剪烱膠和之以遍封瘡上一封之後比

至痂落亦不痛

救急同出第五卷中

文仲療湯火瘡無問大小秘要方

新熱牛糞塗之良

崔氏同出第十七卷中

救急療湯火瘡無問大小秘要方

取粟熬令焦黑投水中攪之良久濾取汁重煎如

糖以敷瘡上並滅癰

崔氏同

又方

取黍米煮粥和鷄子白敷瘡良

並出第五卷中

湯火爛瘡方五首

肘後療湯火爛瘡方

取石膏搗末以敷之立愈

古今錄驗同出第三卷中

備急湯火灼爛方

白歛末塗之立有効

又方

以竹中蠹蟲末塗之良

又方

石灰末以水和塗之乾即易之

並出第八卷中

古今錄驗療湯火爛方

取商陸根搗末以粉瘡上

出第四十卷中

湯煎膏火所燒方四首

肘後療為沸湯煎膏所燒火爛瘡方

丹參細切以羊脂煎成膏敷瘡上

千金備急文仲集驗同

又方

熟搗生胡麻如泥以厚塗瘡上

並出第七卷中

集驗被湯火熱膏所燒不問大小梔子膏方

梔子

三十枚

白斂

黃芩

各五兩

右三味切以水五升麻油一升煎令水氣竭去滓冷
之以淋瘡令溜去火熱毒肌乃得完也作二日任用

膏塗湯散治之

千金並翼古今錄驗小品同出第八卷中

文仲滾湯煎膏所灼火焰所燒方

牛糞新者和以鷄子白塗之比常用之亦不作瘡

不痛神効

出第七卷中

漆瘡方二十七首

廣濟療漆瘡方

煮椒湯洗頻三五度又嚼糯米敷上乾即易之頻

四五度即差忌熱麪肉飲酒

出第五卷中

肘後療卒得漆瘡方

以雞子黃塗之乾即易之不過三五度

文仲同

又方

煮柳葉湯適寒溫洗之柳皮尤妙

集驗必効文仲千金同

又方

取生鱗黃塗之

又方

煮香薷以漬洗之

深師古今錄驗同

又方

濃煮鼠查莖葉洗之亦可擣取汁以塗之

集驗千金同赤

瓜木也

又方

嚼秫米以塗之

又方

以造酒小麴擣末以粉之乾即以鷄子白和塗之
良

又方

按慎火草若鷄腸草以塗之漆姑草亦佳

深師千金翼同

又方

以羊乳汁塗之

千金翼深師同

又呪漆法畏漆人見漆便漆著之

唾之曰漆奕丹陽漆無弟無兄漆自死丹亡二七

須鼠傷三唾之又呪三過止則不復生瘡也

出第四卷

中

刪繁療漆瘡方

取蓮葉乾者一斤以水一斗煮取五升洗瘡上日

再

肘後崔氏文仲千金同

又方

芒硝五兩湯浸洗之

肘後千金翼深師同出第九卷中

千金療著漆洗湯方

取磨石下滓泥塗之取差止大驗

翼同

又方

礬石著湯中令消以洗之

翼肘後同出第
二十六卷中

千金翼療漆瘡方

貫衆擣末以塗之良乾以油和塗之

集驗文仲
肘後同

又方

取猪膏塗之

文仲刪繁千金同

又方

宜噉肥肉

集驗深師千金同

又方

嚼稌穀塗之

出第十九卷中

崔氏療漆瘡方

頻以鹽湯洗之大良

又方

以馬尿洗之差止

備急療漆瘡方

搗韭根如泥塗之煮薤葉洗之佳

肘後深師
崔氏同

又方

取蟹搗以塗之最妙或以水浸之取水數數洗之

亦効

救急療漆瘡方

以鐵漿洗之隨手差頻為之妙

出第八卷中

必効療漆瘡方

取漆姑草搗汁二分和芒硝一分塗之若無芒硝

即朴硝最妙灸韭熨之効

又方

濃煮杉木汁洗之數數用即除小兒尤佳

出第四卷中

古今錄驗療漆瘡方

黃櫨木一斤剉鹽一合二味以水一斗煮取五升

去滓候冷以洗之即差

王長華家神方出第四十三卷中

論曰此疾雖小有著者遍身頭面似癰癩浮腫生瘡痛痒毛髮脫落心煩恍惚不得眠睡因療之遲遂為他疾

或便成風癩亦可畏也

侵淫瘡方七首

肘後療卒得侵淫瘡轉廣有汁多起於心不早療之繞身周匝則能殺人方

以雞冠血塗之良

又方

取牛糞新者絞取汁以塗之亦燒煙熏之

又方

胡鷺窠末以水和塗之

文仲備急同

又方

取鯽魚長三寸者以少豉合搗塗之亦療馬鞍瘡

若先起四肢漸向頭面者難療也又取鯽魚油煎

去魚塗之

文仲備急同出第四卷中

集驗療卒毒氣攻身或腫或赤痛或痒并分散上下周
匝煩毒欲死方

取生鯽魚切之如鱠以鹽和搗遍塗瘡上乾復易

之此為侵淫瘡也

備急同出第八卷中

古今錄驗療侵淫瘡苦瓠散方

苦瓠

一兩

蛇皮

半兩
燒

露蜂房

半兩
熬

大豆

半升

梁上塵

一合

右五味為散以粉粥和塗紙貼赤處日三甚良

又療侵淫瘡戎鹽散方

戎鹽

二分

大黃

四分

蘭茹

一分

右三味搗散以酒和敷瘡上日三良

月蝕瘡方一十二首

廣濟療月蝕瘡方

自死青蛙

一枚
燒灰

母猪蹄

一枚
燒灰

甘草

末

救月杖

燒灰

右四味等分蜜和塗瘡上日二差止

又方

五月五日乾蝦蟇

一枚
燒灰

石硫黃

一兩
研

礬石

一兩
令汁盡

右三味爲散以敷瘡上日二差止

小兒耳後瘡同用
並出第五卷中

肘後療大人小兒卒得月蝕瘡方

五月五日蝦蟇灰以猪膏和塗之差止

文仲備急
集驗同

又方

於月望夕取兔矢仍內蝦蟇腹中合燒為灰末以

敷瘡上差止

集驗崔氏同崔氏云兔矢七枚

又方

取蘿摩草搗末塗之差

又方

燒蚯蚓矢令赤末以猪膏和敷之

文仲備急千金古今錄驗同

又云此瘡多在兩耳上及七孔邊隨月死生故名月蝕瘡也世言小兒夜指月所為實多著小兒也

文仲備急同

又方

水銀

黃連

末各二兩

胡粉

熬

松脂

各一兩研

右四味相和合研水銀硝以塗瘡瘡如乾以臘月猪脂和先以鹽湯洗拭然後敷之

出第十六卷中

集驗療月蝕瘡方

救月蝕鼓皮如手許大一片以苦酒三升漬一宿
以塗瘡上或云燒作灰脂和敷之

崔氏同

又方

虎頭骨

二兩
碎

浮萍

屑一
兩

右二味以豬脂一斤煎取骨黃成膏以塗瘡上

崔氏
同

又方

茱萸根

地榆根

薔薇根

右三味各等分為散作湯洗瘡取藥塗瘡上日三

崔氏

同

又方

然燭照瘡使燭熱氣相及瘡即愈

崔氏古今錄驗同並出第九卷

中

千金翼療月蝕瘡惡肉方

班猫

去足起熬

石硫黃

藺茹

各一兩末

右三味擣篩以塗瘡上如瘡乾以豬脂和塗之日三

出第二十四卷中

代指方一十一首

小品代指者其狀先腫焮焮熱痛色不黯黑然後緣爪甲邊結膿劇者爪皆脫落亦謂之代指病也

又代指無毒正繇人筋骨中熱盛撮結故耳吳人名遭指野夫名為土盧即皆是代指疾也療方

單煮甘草汁漬之或用芒硝湯漬之擣青菜汁搗之但得一種浸搗之即差

千金同

肘後療代指方

以猪膏和白善敷之數易差止

深師千金翼同白善一作曲蟻土

又方

以指刺炊上熟飯中七遍

文仲集驗深師千金范汪同

又方

取梅核中仁熟擣以淳苦酒和敷之須臾差止

文仲

同

又指忽掣痛不可忍方

灸指頭痛處七壯愈

千金同

又指端忽發瘡方

燒鐵令熱勿令赤以灼之上二方俱主代指

並出第五

卷中

千金翼療代指方

先刺去膿灸鮓皮令熱以裹縛指令周匝痛即止

便愈

千金同出第二十三卷中

崔氏論代指者是五藏之氣使然流注於十二源經脉熱衝手指不還即代指也

當取熱湯急漬之即出使滿七度便以冷水中浸之訖又復浸之如此三度即塗羊膽愈未成膿此方甚効或以猪膽盛代指纏之差

本方云訖乾封桂末便愈出第

四卷中

備急療手指忽腫痛不已者名為代指方

和泥泥指令遍周匝厚一寸許以熱灰中炮之令

燥視皮皺即愈不皺者更為之良

文仲深師
范汪同

又方

取梁米粉鐵鐺中熬令赤以衆人唾和之塗上令厚一寸即消

又方

小便和鹽作泥厚裹之數易差鑱針刺血出最妙
出第五卷中

甲疽方五首

崔氏夫甲疽之為病或因割甲傷肌或因甲長侵肉成瘡腫痛復緣靴窄研損四邊腫焮黃水出侵淫相染五

指俱爛漸漸引上脚跌泡漿四邊起如火燒瘡日夜倍增萬醫所不能療之方

綠礬石五兩形色似朴硝而綠色

右一味置於鐵版上聚炭封之以囊袋吹令火熾即沸流出色赤如融金看沸定汁盡去火待冷收取接爲末色似黃丹先以鹽湯洗瘡拭乾用散敷瘡上唯多爲佳著藥訖以軟綿纏裹當日即汁斷瘡乾若患急痛即塗少酥令潤每日一遍鹽湯洗濯有膿處則

洗使淨其痂乾處不須近每洗訖敷藥如初似急痛
即塗酥五六日即覺瘡上痂漸剝起但依前洗敷藥
十日即瘡漸漸摠剝痂落軟處或更生白膿泡即捺
破敷藥自然摠差神驗無比刑部張侍郎親嬰此病
卧經六十餘日困頓不復可言在京衆醫並經造問
皆隨意處方了無効驗唯此法得効如神今故錄之
以貽好事者

出第五卷中

救急療甲疽方

屋上馬齒菜

崑崙青木香

印成鹽

右三味各燒成灰並等分又取光明砂少許於諸藥中拌揔和下篩為細散以敷瘡上乾即易之以差止當瘡未差以前不宜食鷄豬魚肉腥穢酒蒜等差後仍三十日忌酒良

出第九卷中

必効療甲疽赤肉生甲邊上裹甲者方

取爪州礬石燒令沸定未敷之濕即刮却更著日數易即消散竇宣城綽云効亦主雜瘡有蟲有黃

水若得吳白礬石亦佳若無雞矢礬亦好

又療甲疽瘡腫爛生腳指甲邊赤肉出時差時發者方

黃芪 二兩

藺茹 三兩

右二味切以苦酒浸一宿以豬脂五合微火上煎取
三合絞去滓以塗瘡上日三兩度其息肉即消散

出第

四卷中

近効療甲疽瘡神妙方

熏黃 慳好者

蛇皮

右二味等分更和研之又先以溫泔清浸洗瘡令軟以尖刀子割去甲角入內處裏乾取藥棗栗許大以敷瘡上用軟綿裹之半日許藥濕即易之一日許即永除其先痛者敷藥訖一飯頃即宜痛定差訖一二日勿著窄靴鞋若能斷酒及猪雞魚蒜麪等其効愈遠其藥不過三四度永差

篇十四郎中有効

肉刺方二首

古今錄驗療肉刺方

好薄刮之以新酒醋和羊腦敷之一宿洗去常以
綿裹之良

出第四十一卷中

近効療肉刺方

以黑木耳取貼之自消爛又不痛宜以湯浸木耳
軟乃用之

手足皸裂方五首

深師療手足皸裂方

蜀椒四大合汗以水一升煮之七沸去滓漬之半

食頃出令燥須臾復浸塗羊猪髓腦尤妙

范汪同出第二

十九卷中

集驗療手足皸裂血出痛方

若涉冰霜凍面及手足皸裂瘡壞取麥窠濃煮汁
及熱以浸洗之即差

又方

取蔥葉萎黃及籜煮以漬洗之

范汪同

又療人脚無冬夏常坼裂名曰尸脚此因履踏洗尸水

及惡物故也方

取雞屎一升以水二升煮數沸待小冷以漬脚半

日不過三四度差

深師千金范汪
同出第九卷中

千金療手足皴裂血出疼痛方

猪脬著熱酒中以洗之即差

深師集驗同云無酒
用湯亦佳出第二十

四卷中

手足逆臚及瘡壞方二首

范汪療手足指逆臚方

真珠 一分

乾薑 二分

右二味搗末以塗瘡指上日三 千金深師同

深師療冬月冒涉凍凌面目手足瘡壞及始熱痛欲瘡者方

蜀椒 二分

芎藭 二分

白芷

防風 各一分

薑

一分一作鹽

右五味以水四升煎令濃以洗之 出第二十卷中

疣目方一十九首

肘後療疣目方

月晦日夜於廁前取故草二七莖莖研二七過粉
疣目上訖呪曰今日月晦疣驚或明日朝乃棄勿
反顧之

又方

取亡人枕若席物以二七拭之亡人近彌易去也
並出第五卷中

集驗療去疣目方

七月七日以大豆一合拭疣目上三過訖使病疣
目人種豆著南向屋東頭第二雷中豆生四葉以
熱湯沃殺疣目便去矣

千金肘後范汪同

又方

取松柏脂合和塗其上一宿即不知處

千金同

又方

作艾炷著疣目上灸之三炷即除

范汪千金同

又方

以石硫黃突疣目上六七過除

千金同

千金去疣目方

取月十五日正中時望月以禿茗帚掃疣目上
三七遍差止

又方

以猪脂痒處搯之令少血出即差神驗不可加也

又方

以苦酒漬石灰六七日取汁點疣上小作瘡即落

又方

杏仁燒令黑研如膏塗之令差止

又方

以牛涎數塗之自落

並出第二十四卷中

崔氏疣目方

取月盡日平旦井花水月生一日煮作湯竈突北面南自洗呪曰日盡水月初湯竈突北千疣死百疣亡凡七度洗及呪甚良

又方

先布紙一張於牀上即以筆點疣一下還點紙一下無問多少皆一一點每點即呪曰紙亦爛疣亦散點一遍訖乃深埋點紙於屋溜下久當疣散

又方

以蜘蛛網絲繞纏之自落良

又方

盜取一醎酒醋以摩疣上呪曰疣疣不知羞一醎

酒醋洗你頭急急如律令呪滿七遍久即自愈並出

第四卷中

張文仲療手足忽生疣目方

葫蘆赤子按使壞疣目上塗之即去

范汪同

又方

以鹽塗疣上令牛舐之不過三度

出第五卷中

近効療疣子法

以墨塗之不過五度即差

又方

以屋溜下水塗疣上

帝給事方

去黑子方二首

集驗去黑子及贅方

生藜蘆灰

五升

生薑灰

五升

石灰

二升半

右三味合和令調蒸令氣溜取甑下湯一斗從上淋之盡湯取汁於鐵器中煎減半更開火煎以雞羽搖中即然斷藥成欲去黑子疣贅先小傷其上皮令裁

破以藥點之此名三灰煎祕方

古今錄驗范汪同出第九卷中

救急去黑子方

夜以煖漿水洗面以布揩黑子令赤痛挑動黑子
水研白梅檀取濃汁以塗黑子上旦又復以煖漿
水洗面仍以鷹屎粉其上

出第三卷中

疣贅疵黑子雜療方六首

深師灰煎療瘤贅癥痕疵痣及癰疽惡肉等方

石灰

一斗五升

濕桑灰

四斗

柞櫟灰

四斗

右三味合九斗五升以沸湯令浥浥調濕內甑中蒸之從平旦至日中還取釜中沸湯七斗合甑三淋之澄清內銅器中煎令至夜斟量餘五斗汁微火徐徐煎取一斗洗亂髮乾之如雞子大內藥中即消盡又取五色綵剪如韭葉大量五寸著藥中亦消盡又令不強藥成以白甕子中貯之作藥時不得令婦人小兒雞犬臨見之灰煎亦療瘤驗其肉瘤石瘤藥敷之皆愈其血瘤瘤附左右胡脉及上下懸癰舌本諸險

處皆不可令消消即血出不止殺人不可不詳之
又療疣贅方

取速讀子熟時壞破之以塗其上便落

並出第二十九卷中

千金療皮中紫赤疵痣靨穢方

乾漆

熬

雌黃

礬石

各三兩熬

巴豆

五十枚

炭皮

一斤

雄黃

五兩

右六味為散以雞子白和塗故綿貼病上日二易之

即除

深師加莽草三兩餘同出第二十四卷中

又療疣贅疵瘕方

雄黃

硫黃

真珠

礬石熬

蘭茹

巴豆去皮心

藜蘆各一兩

右七味為散以漆和令如泥以塗貼病上頃成瘡及去面上黑子點之即去深師同出第二十四卷中

古今錄驗療黑子去疣等五灰煎方

石灰

蒟藳灰

桑灰

炭灰

葦灰

各一升

右五味以水搜蒸令氣匝仍取釜中湯淋取清汁五升許於銅器中東向竈煎之不得令雞犬小兒女人穢者見之膏成好凝強如細沙糖即堪用量以點封之

出第五卷中

廣濟療疣贅赤黑疵痣靨穢瘡疽息肉強結瘤等神効
灰煎方

炭灰三升湯拌令濕徹以熱湯漬令半日後還以湯淋之稍稍點湯不得太速下即灰汁不驗候汁

下得三二升即內一小鐺中煎令一兩沸即別取
一兩石灰風化者為佳恐中濕者須熬令極熱內
灰汁中和煎以杖箠攪之勿住手候如煎餅麪少
許細細取成膏急瀉著一瓷器中攪令冷不然須
更乾燥不堪用常候此煎十分有一分堪久傳但
有傷損肉色須更變赤黑色痛如火燒狀若灸癰
發焮經二十餘日病自然脫落無癰痕欲衝風冷
遠行貼烏膏亦神効痂亦易落瘡未差間忌小豆

薑外縱有癰亦不凸出烏膏

在二十四卷中

滅癰痕方一十七首

廣濟療人面癰痕滅之方

取白雞以油脂和水煮小麥令熟純以飼雞三兩
日大肥安雞著版上作籠籠之七日莫與雞食空
飼清水七日取豬脂去脉膜切噉飼如食糞皆凝
白開收煖水取塗癰上十度平復舊欲用塗以麝
葛布揩微赤離離訖然後塗之男女俱用効也

又療人面及身瘡癰不滅方

鷹白糞

爛腐骨

尿白鹹

各四分

麝香

二分

右四味研令如粉以葛布揩令赤微離離以脂和敷之日二度差止

並出第五卷中

劉涓子六物滅癰膏方

衣中白魚

雞屎白

鷹糞白

芍藥

白欬

白蜂

等分

右藥研如粉以乳汁和塗癰上日三良

出第五卷中

小品滅癰方

雞矢白

一兩

辛夷

四分

白附子

二分

細辛

二分

右四味酒浸一宿以羊脂六合微火煎三上三下去

滓傷癰以甘草洗訖塗之

一方有桂心二分

又方

鷹屎白一兩研白蜜和塗癰上日三

並出第十卷中

千金翼凡面皰瘡癰三十年以上并冷瘡薑黃癰金瘡等

方

斑猫

三枚去足翅熬

巴豆

三枚去心皮

蜜陀僧

胡粉

二兩

鵝脂

三兩

煎金鉶洮沙

三兩

高良薑

三兩去皮

海蛤

三兩取中者

右八味為粉用鵝脂和夜半塗之旦以甘草湯洗之

差止

出第五卷中

救急滅癰方

猪脂三斤飼烏雞令三日使盡收取白矢內白芷

當歸各一兩煎白芷令黃去滓內鷹矢白二分攪

令調塗之旦洗之

千金同

又方

疾藜子

山梔子仁

各一合

右二味為散醋漿和如泥臨卧時以塗之旦洗之

針

同

又方

痕凸出秋冬小麥麴春夏大麥麴下篩令細以酥

和封之良

千金同

又方

夏以熟瓦熨冬以凍凌熨之 千金同

又方

鷹矢白 一兩

白魚 二七枚

右二味為散蜜和塗之日三即差 千金同

又方

鷹矢白 十分

白殭蟬 八分

右二味研如粉白蜜和敷之日三差慎五辛肥膩生

冷物 千金同

又方

臘月猪脂四升煎大鼠一枚令消盡以生布摩傷

以塗之日四五過

千金同並出
第三卷中

必効滅癰方

禹餘糧

半夏

右二味等分末以雞子黃和之先以新布拭癰上令
赤以塗之勿令見風二十日滅矣十年癰無不愈平

復如故

救急范千金同

又療灸瘡及金瘡凡百瘡癰能令高者平下者起方

雞屎白

鷹屎白

各二合

辛夷仁

四分

白附子

杜若

各三分

細辛

二分

右六味下篩以赤蜜少少和先以布揩癰微破塗之
日二差後忌五辛小豆油膩及酢飲酒等若慎口味

如大小淺深無不差

一本無杜若有桂心並出第四卷中

古今錄驗療面上癰滅之方

白殭蠶

一兩

珊瑚

一兩

白芷

一兩

雞矢白

一兩

朱砂

研一兩

右五味搗蜜和敷之尤良

又方

木蘭香一斤以三歲米醋浸令没百日出暴乾
末以塗之一方用醋漿水浸百日出暴乾末服方

寸七日再

出第三卷中



外臺秘要方卷二十九